

記滬埠商董在美領事署會議并與美使問答語

美國新派駐滬總領事勞治師君柬邀滬上紳商於禮拜日卽四月十八日十點鐘在總領事署會商續訂華工事鐘鳴十下商董嚴小舫徐雨之周金箴曾少卿謝綸輝蘇葆笙李雲書邵琴濤諸君同時到署總領事勞治師君偕繙譯白葆羅君肅客入廳事在座有美新公使柔克義君副領事達飛聲君等柔公使云今日諸君辱臨不勝欣慰且可藉談近日公事李雲書君答云願安承教公使云外間近日頗有以敝國續定苛約騰爲口實者然其實並無此事本政府擬定續約極欲改良務使兩國均沾利益外間所說似有誤會按續約須由下議院議准然後簽允爲時尚在六個月後今議抵制殊非其時且敝國與貴國睦誼最敦商情亦素所最洽一旦不用美貨於兩國交情或有關礙曾少卿君云續約改良衆所願聞然舊約何嘗有苛待明文而流弊如此至兩國交誼則誠如貴公使所云久爲敝國上下所公認然貴國所以不平等相待者蓋非本意工黨爲之僕於書肆購有貴國華工禁約記特專呈閱所有歷屆約章以及種種苛待情形言之極詳竊願貴公使一爲流覽柔君云禁

約改良容當商權不過稍待時日而不用美貨之說貴商董當體兩國政府平日交誼勸諭衆人千萬不可紛擾蘇葆笙君答云貴國洋布僕消最多定貨有定至年底者貴公使頃言簽約尙待六個月後當非虛語然貴國一日不定約卽華人一日不定心不必不用美貨卽此逐步減消於僕卽大有不便何能待至六月惟貴公使熟思審處焉柔公使又以洋文四紙令白繙譯操華語演說大意宣明兩國交誼并舊約並無苛待等語（此紙令繙譯譯成華文送交商會）周金箴君云貴國本文明之國所不滿人意授人口實者不過偏護工黨耳誠如公使所云完全文明貴國當爲天下公認言至此衆皆拍手閱報時鐘已十二句衆興辭爲總領事勞君副領事達君重言申明一再挽留及至辭出已鐘鳴十二點三刻矣